

МЕСЯЦА ДЕКЕМВРИЯ В 12-Й ДЕНЬ

ПРЕПОДОБНАГО ОТЦА НАШЕГО СПИРИДОНА ЧУДОТВОРЦА, ЕПИСКОПА
ТРИМИФУНТСКАГО

ВЕЧЕР

На Господи, воззвах: стихиры на 6, глас 5.

Подобен: Радуйся:

Радуйся, архиереев правило, * Церкви непоколебимое утверждение, * славо православных, * чудес источниче, * любви струя неистощимая, * светильниче многосветлый, * духа органе, * уме Божественный, * кроткий и незлобивый, * иже простотою истинною украшаем, * человече Небесный, земный Ангеле, * винограда делателю, * Христов друже искренний, * Того моли подати тебе чтущим велию милость.

Кроток и наследник земли ты кротких * воистинну показался еси, Спиридоне, * отцев славо, * иже жилами мудрых и простых твоих словес Божественною благодатию * врага вселукаваго и пребезумнаго Ария удавил еси * и, веление Божественное всем уяснив, * верным показал еси, * и спасительное возвысив духом, * вся же православныя просветив яснейше * Едию славити Слово, * яко воистинну Единосущное Отцу Пребезначальному, * подающее миру велию милость.

Страсти умертвив плотския, * мертвыя благодатию Божию возставил еси, * и змию в злато претворил еси, * и реки стремление молитвою твоею, отче, обуздал еси; * нощию же царю явлься бедствующему, * сего исцелил еси к сердцу приближением, * Господу ты преславно прославляюще. * Темже велегласно твою память почитаем * и мощей Божественную и священную раку чтим, * из неяже истекает врачеваний Божественная струя * и велия милость.

Слава, глас 1:

Преподобне отче, блаженне Спиридоне мудре, * мертвую, якоже живу, спросил еси любви ради Божия; * змию же преложил еси в злато нищетою обдержимому, * течение же удержал еси реки, сострадательствовав людем; * царю же предстал еси врач промышлением Божиим; * мертвыя же паки возставил еси, яко Того ученик, * и веру уяснил еси посреде отцев многих. * Вся убо могий во укрепляющем тя Христе, * Того и ныне моли спастися душам нашим.

И ныне, Богородичен или Крестобогородичен.

Подобен: Всехвальнии мученицы:

Заколение Твое несправедное, Христе, * Дева зрящи, * плачущи, вопияше Ти: * Чадо Сладчайшее, * како без правды умираеши? * Како на Древе висиши, * Иже всю землю повешей на водах? * Не остави Мене едины, Благодателю Многомилостиве, * Матерь и рабу Твою, молюся.

На стиховне Октоиха.

Слава, святаго, глас 2:

Святителей Божественный сосуд, * отче преподобне, Спиридоне мудре, * ты добродетельми показался еси: * сего ради Церкви предстатель быв, * ересеначальники изгнал еси * и Ариево хуление соборне на землю низложил. * Темже, чудодействуя делом и словом, * Спаса моли спастися душам нашим.

И ныне, Богородичен или Крестобогородичен.

Подобен: Егда от Древа:

Древу крестному Тя, Иисусе, пригвождена зрящи Неискусобрачная, * плачущи, глаголаше: * Чадо Сладкое, почто оставил еси Мене, * рождшую Тя, едину, * Свете Неприступный Пребезначальнаго Отца? * Потщися и прославися, * яко да славу получат Божественную * иже Божественныя страсти Твоя славящии.

Тропарь, глас 1:

Собора Перваго показался еси поборник и чудотворец, * Богоносе Спиридоне, отче наш. * Темже мертву ты во гробе возгласив, * и змию в злато претворил еси, * и внегда пети тебе святых молитвы * Ангелы, сослужащия тебе, имел еси, священнейший. * Слава Давшему тебе крепость, * слава Венчавшему тя, * слава Действующему тобою всем исцеления.

Или сей, глас 4: Правило веры:

Слава, и ныне, Богородичен.

НА УТРЕНИ

Оба канона Октоиха, без мученичнов. И святаго канон на 6. Глас 2. Творение
Феофаново.

Песнь 1

Ирмос: Во глубине постла иногда * фараонитское всевоинство преоруженная сила, * воплощенное же Слово всезлобный грех потребило есть: * препрославленный Господь славно бо прославился.

Кротких землю достиг, отче, яко кроток, и милостив, и чист быв, настоящую сердца моего укроти бурю, яко да, в тишине Божественной быв, песнословлю тя.

Делания Божественными душу, отче, очистив, Боговиден, Спиридоне, был еси и Божественного Духа пресветлым обогатился еси осиянием; тем озаряеши чисто блажащая тя.

От паствы, якоже Давид, ты восприем, Содетель словесная ты постави паствы пастыря всеизящнейша, простотою и кротостию сияюща и беззлобием, преподобне пастырю, украшаема.

Богородичен: Пресвятая Дево Чистая, просвети и освати помышления и душу мою, молюся, облаки разоряющи невежества моего и тьму отъемлющи греховную, яко да по долгу ублажаю Тя.

Песнь 3

Ирмос: На камени мя веры утвердив, * расширил еси уста моя на враги моя, * возвеселился дух мой, вегда пети: * несть свят, якоже Бог наш, * и несть праведен, паче Тебе, Господи.

Ум твой безстрашием просветив и Божественным смирением украсився, дарования Духа приял еси отгонити духи и решити недуги верно чтущих тя, священнейше.

Змия началозлобнаго убив, нрав сребролюбный поправ, милуя требующаго, святителю, змия преложил еси в золотую утварь священными твоими молитвами, отче преподобне.

Возшел еси на гору безстрастия, вшел еси во храм Боговидения, в скрижали же сердца твоего приял еси закон спасительный, яко священнейший и угодник присный Владыки Твоего.

Богородичен: Уврачи струны души моя, ум мой, омраченный нерадением, Богоневесто, озари, да пою: несть непорочны, паче Тебе, Непорочная, и несть чисты, паче Тебе, Владычице.

Седален, глас 8.

Подобен: Премудрости:

От паствы овец предстательствовати Христове Церкви вручився, * пастырь Богопроизведен ты, Спиридоне, возсиял еси, * злославия волки отгнал еси словесы твоими, на благочестия пажити сию воспитав. * Темже посреде Богоносных отцев веру утвердил еси мудростию духа, * иерарше блаженне, моли Христа Бога, прегрешений оставление даровати * празднующим любовию святую память твою.

Слава, и ныне, Богородичен. Подобен:

Яко Всенепорочная Невесто Творцу, * яко Неискусомужная Мати Избавителя, приятелище яко сущи Утешителя, Всепетая, * беззакония мя суща скверное обителище * и демонов игралище в разуме бывша, * потщися от тех злодейства мя избавити * и светлое жилище добродетелей соверши, светоносная, нетленная. * Отжени облак страстей и Вышняго причастия сподоби * и света невечерняго молитвами Твоими.

Крестобогородичен:

Агнца, и Пастыря, и Избавителя Агнца зрящи на Кресте, * восклицаше, плачущи, и, горько рыдаючи, вопияше: * мир убо радуется, приемляй Тобою избавление, * утроба же Моя горит, зрящи Твое распятие, * еже терпиши за милосердие милости. * Долготерпеливе Господи, милости бездно и источниче неисчерпаемый, * умилосердися и даруй согрешений оставление * верою поющим Божественныя страсти Твоя.

Песнь 4

Ирмос: Пришел еси от Девы не ходатай, ни Ангел, * но Сам, Господи, воплощся, * и спасл еси всего мя, человека. * Тем зову Ти: слава силе Твоей, Господи.

Углыми Честнаго разжегся Духа, страстей удобопопаляемую вещь, всеблаженне, пожег еси, мир же огнесияньми добродетелей твоих, Спиридоне, просветил еси.

Умертвив твоя плотская движения, Богодохновенне, мертвья возставил еси животворным твоим проглаголением. Темже молю тя: умерщвленную душу мою, отче, оживи.

Повинующися, мертвая тебе глас, отче, даде и речная стремления твоими удержашася повелении: явился еси бо, блаженне, чудоделатель, Божественную благодать приемь.

Богородичен: Пророцы Твоего таинства глубину провозвестиша недомысленную: едина бо родила еси, Чистая, Недоразумеваемого, воплощенна за милосердие неисповедимое.

Песнь 5

Ирмос: Просвещение во тьме лежащих, * спасение отчаянных, Христе, Спасе мой, * к Тебе утреннюю, Царю мира, * просвети мя сиянием Твоим, * иного бо, разве Тебе, бога не знаю.

Река сущих в тебе дарований всякое напоет, преподобне, сердце, всем дарует богато здравие, вся Бога к славе возставляет, тебе прославльшаго и чудодействы всякими почествовавшего.

Тя царь земный, блаженне, Царя Небеснаго яве позна искренняго раба и дарований Божественных исполненнаго, внегда приити тебе к нему великаго врача к Богу возвещая.

Авраамову страннолюбному нраву ты уподобився, всем дома твоего входы отверзл еси, и всем всяк был еси, и промышляя сущими во обстоянии, Спиридоне блаженне.

Богородичен: Нова нам породила еси Младенца, прежде веков, Отроковице, рожденна от Отца Безначальна. Егоже умоли, яко Сына и Бога Твоего, ущедрити Богородицу Тя, Пречистая, душою чистою возвещающия.

Песнь 6

Ирмос: В бездне греховней валяясь, * неизследную милосердия Твоего призываю бездну: * от тли, Боже, мя возведи.

Злато, яко кал, тебе вменися, паче злата безстрастием сияюще и обогатившуся, преподобне, дарованиям всезлатыми Духа.

Чисто служа Владыце Твоему, множество имел еси, преподобне, послушающее Тебе ангельских сил невидимыми гласы, священнейше.

Преславное, всеумудре, житие твое миру ты преславна, отче, содела. Темже Божественную память твою, радующеся, совершаем, поюции Тя.

Богородичен: Небес ширши чрево Твое бысть, Неискусомужная, Бога вместившее, нигдеже вместимаго, Всесвятая Дево Богоневесто.

Кондак, глас 2.

Подобен: Вышних ища:

Любовию Христовою уязвився священнейший, * ум вперив зарею Духа, * детельным видением твоим деяние обрел еси, Богоприятне, * жертвенник Божественный быв, * прося всем Божественного сияния.

Икос: Из чрева освященного иерарха Господня, восхвалим ныне Спиридона, благодати скрижали приемшаго Божественныя славы, и в чудесех преславнаго всей твари, и яко тепла и самовидца Божественнаго осияния, яко нищих предстателя и согрешающих душеводца: той бо Божественна Престолу Христову жертва бысть, прося всем Божественного сияния.

Песнь 7

Ирмос: Богопротивное веление беззаконнующаго мучителя * высок пламень вознесло есть. * Христос же простре Богочестивым отроком росу духовную, * Сый благословен и препрославлен.

Моисеево незлобие, Давидову кротость, Иова Авситидскаго непорочное стяжав, Духа был еси жилище, поя, священнейше: Сый благословен и препрославлен.

Орошения на главу твою во время жатвы Небеса искапаша, будущее прознаменоваша: Бог бо, якоже рече, Божественную память твою, преподобне, прослави, верныя освящая ходатайством твоим.

В соборе отцев ты Бог прославляет, на суде слова твоя сохраняша, блаженне, яже верою принесл еси, безсловеснейшаго Ария обуяющая яве и упраздняющая сего противление.

Богородичен: Грозд возрастала еси неизреченным словом, яко лоза, Дево, Единого невозделаннаго, вино источающая, вся веселящее, вся освящающая земныя и всяко пьянство лютых отъемлющая.

Песнь 8

Ирмос: Пещь иногда огненная в Вавилоне действия разделяше, * Божиим велением халдеи опаляющая, * верныя же орошающая, поюция: * благословите, вся дела Господня, Господа.

Пещь страстей Божественными одожденьми Божественнаго Духа погасил еси и росу источил еси недугов, отче, зной отъемлющую верно к тебе приходящих всегда, блаженне Спиридоне пребогате.

Безлюбив, прав, кроток же, и милостив, и незлопамятлив был еси, любовен, страннлюбец, иерарх священнейший, мудростию украшен, преподобне, Православия. Темже ты верою почитаем.

Древле тебе глас, яко жива, умершая вопрошшу ти, отче, даде. О, чудесе изрядна! О, преславнаго таинства! О, благодати, юже получил еси, житием украшаемь ангельским, досточудне!

Богородичен: Страсти моего сердца исцели милостию Твоею, Всепетая, ум мой умири, и душу мою просвети, и ходиши мя возблагодарити на стези спасительныя, яко да присно пою Тя, Всепетая.

Песнь 9

Ирмос: Безначальна Родителя Сын, Бог и Господь, * воплощся от Девы, нам явился, * омраченная просветити, собрати расточенная. * Тем Всепетую Богородицу величаем.

Безначальна Родителя Сына ясно проповедал еси, Единосущна Отцу и Соприсносущна, посреде Богоносных отцев возвеличився, и беззаконующих заградил еси уста, святителю всеблаженне.

Многосветлое солнце, отцев украшение, иереев слава, Ангелов совсельниче, твою светносную память радостно ныне совершающая Света сподоби невечерняго молитвами твоими.

Божественная селения, град Небесный, празднующих красный лик освященную душу твою и добродетельми украшенную, всеблаженне, прият во гласе радования.

Богородичен: Велие таинство паче ума Рождества Твоего удивляет Ангелы, Богорадованная, наслаждает преподобных собор, священныя же веселит отцы, Божественно поющая ты, надежду душ наших.

Светилен Октоиха.

Слава, святаго.

Подобен: Небо звездами:

Тя от безсловесныя паствы преведе в словесную Дух, Богоносе, * якоже Моисея и Давида, ихже уподобился еси нраву, Спиридоне, * свете вселенныя.

Богородичен:

Сущих от Бога миру поданных благих Ты вина была еси, Богородице, * но и ныне умилостиви о общем спасении благопременнаго Бога.

На стиховне Октоиха.

Слава, святаго, глас 4:

Преподобне отче, святителю прехвальне, * апостольскаго учения быв исполнен * и Божественнаго Духа жилище * добродетельнаго ради жителства показався, * церковныя волки учеными отгнал еси * и Православных веру уяснил еси, * столп явился еси благочестия и поборник. * Темже и, чудодействуя в концех, * змию в злато преложил еси * и мертвую к вопрошению воздвигл еси, * но, о отцев досточудне и учителей собеседниче! * Спасу молися спасти души наша.

И ныне, Богородичен или Крестобогородичен.

Подобен: Яко добля:

Умерщвляема видящи Христа, * Пречистая Владычица, * умерщвляюща
льстиваго, * восклицаше, горце зывающи, * иже из утробы Тоя произшедшу, * и,
долготерпению Его чудящися, зываше: * Чадо Мое Любезнейшее, * не забуди рабы
Твоя, * не закосни, Человеколюбче, Мое утешение.

НА ЛИТУРГИИ

Блаженны Октоиха и святого песнь 3-я.

Ум твой безстрашием просветив и Божественным смирением украсився, дарования Духа приял еси отгонити духи и решити недуги верно чтущих тя, священнейше.

Змия началозлобнаго убив, нрав сребролюбный поправ, милуя требующаго, святителю, змия преложил еси в золотую утварь священными твоими молитвами, отче преподобне.

Слава: Возшел еси на гору безстрастия, вшел еси во храм Боговидения, в скрижали же сердца твоего приял еси закон спасительный, яко священнейший и угодник присный Владыки Твоего.

И ныне: Богородичен: Врачи струпы души моя, ум мой, омраченный нерадением, Богоневесто, озари, да пою: несть непорочны, паче Тебе, Непорочная, и несть чисты, паче Тебе, Владычице.

Тропарь святого, глас 1:

Собора Перваго показался еси поборник и чудотворец, * Богоносе Спиридоне, отче наш. * Темже мертву ты во гробе возгласив, * и змию в золото претворил еси, * и внегда пети тебе святая молитвы * Ангелы, сослужащая тебе, имел еси, священнейший. * Слава Давшему тебе крепость, * слава Венчавшему тя, * слава Действующему тобою всем исцеления.

Кондак святого святого, глас 2.

Любовию Христовою уязвився священнейший, * ум вперив зарею Духа, * детельным видением твоим деяние обрел еси, Богоприятне, * жертвенник Божественный быв, * прося всем Божественнаго сияния.

Прокимен, глас 1: Уста моя возглаголют премудрость, * и поучение сердца моего разум.

Стих: Услышите сия вси языцы, внушите вси живущии по вселенней.

Апостол ко Евреем, зачало 335.

Братие, повинуйтеся наставником вашим и покаряйтесь, тии бо бдят о душах ваших, яко слово воздати хотяще, да с радостию сие творят, а не воздыхающе, несть бо полезно вам сие. Молитесь о нас, уповаем бо, яко добру совесть имамы, во всем добре хотяще жити. Лишше же молю, сие творите, да вскоре устроюся вам. Бог же мира, возведый из мертвых Пастыря овцам великаго, кровию завета вечнаго, Господа нашего Иисуса Христа, да совершит вы во всяком деле блазе, сотворити волю Его, творя в вас благоугодное пред Ним, Иисус Христом. Емуже слава во веки веков. Аминь.

Аллилуия, глас 2: Уста праведнаго поучатся премудрости, и язык его возглаголет суд.

Стих: Закон Бога его в сердце его, и не запнутся стопы его.

Евангелие от Луки, зачало 24.

Во время оно, ста Иисус на месте равне, и народ ученик Его, и множество много людей от всея Иудей и Иерусалима, и помория Тирска и Сидонска, иже приидоша послушати Его и исцелитися от недуг своих, и страждущии от дух нечистых, и исцеляхуся. И весь народ искаше прикосатися Ему, яко сила от Него исхождаше, и исцеляше вся. И той возвед очи свои на ученики своя, глаголаше: блажени нищии духом, яко ваше есть Царствие Божие. Блажени, алчущии ныне, яко насытитесь. Блажени, плачущии ныне, яко возсмеетесь. Блажени будете, егда возненавидят вас человецы, и егда разлучат вы и поносят, и пронесут имя ваше яко зло, Сына Человеческаго ради. Возрадуйтеся в той день и възиграйте, се бо мзда ваша многа на небеси.

Причастен: **В** память вечную: